

LA PATRIE DAL FRIÛL

SFUEI MENSÎL INDIPENDENT

www.lapatriedalfriul.org

info@lapatriedalfriul.org

DIREZION E AMINISTRAZ. - GLEMONE - VIA BASILIO BROLLO 1

Tassa pagata / Taxe perçue Udine Italy - mensile / mensîl spedizion in abonament postâl Poste italiane s.p.a.

TRIEST CITÂT METROPOLITANE: LIS BAUSIIS DAI PARTÎTS TALIANIS

Dree Valcic

** I autonomiscj furlans a àn sostignût simpri di jessi favorevui a une specifiche soluzion pal câs Triest. Une volte afermade la diversitât storiche, economiche e culturâl tra la capitâl regionâl e dut il Friûl, di Gurize a Pordenon e duncje no dome Udin, si è sostignût simpri la dibisugne di une forme ancje istituzionâl che e fissàs cheste realtât. Il dibatiment in chescj agns al à produsût fin cumò dome cjacaris, cence rivâ a dâ prin di dut rispueste al cuesît: Triest di une bande e il Friûl di chê altre, ma dentri de stesse region o sielzint une soluzion diverse di plante fûr? Intant che lis peraulis a corevin, i fats a cjapavin però une plee diverse cul grup di interès triestin simpri plui compat

e transversâl che al slargjave la sô influence su la zone di Gurize, che si presentave sul plan nazionâl tant che referent naturâl de Region, che cu la sô rapresentance, un pas daûr chel altri, al leve a identificâsi. La complicitât e la conivence de classe politiche furlane pal otigniment di chest obietf a son sot dai voi di ducj. Il tradiment al passe sot de ideologie de unitât regionâl, cul atac sordin a dutis lis formis di "ecelence" che no àn di jessi plui caraterizadis dal lôr jessi furlanis, ma ben dal "Fvj" (di scrivi dut tacât, cence tratin).

** Ma ancjemò nol baste! La ipocrisie dal Pd e rive a nivei ancjemò plui alts cuant che si fevele di Nord Est. A pene che si impiin

i rifletôrs su la possibile creazion de macroregion, la Serracchiani, in vieste di presidente, e fâs fente di sbregâsi lis viestis, e zure che mai e mai altri si fasarà cheste ipotesi di agregazion al Venet. Dopo e torne vicesegretarie dal Partît e e tâs in maniere cussiente davanti des esternazions dal so cjâf grup te Cjamare, chel Ettore Rosato, rût triestin, che in dute trançulitât al aferme che la ipotesi plui increditade e je propit chê dal "Grant Nordest". No dome che il dam, ma ancje la burlade pal Friûl che al varès di puartâ in dote la SÔ autonomie speciâl ae agregazion istituzionâl neonade.

** In chest cuadri duncje il dibatiment su la citât metropolitane

al cjape l'aspiet di une grande cjolte vie pai furlans, che i lôr dirits di rapresentance unitarie a son stâts za crustignâts de creazion des Uti. E se al è pûr vêr, cemût che al sosten cualchidun, che no saran chestis "disposizions di leç" a cancelâ la nestre identitât, in spiète dai numars vêrs sui sparagns efetifs e sui vantaçs, un prin risultât cheste polverizazion lu à otignût za: nancje un sbaļç di rabie e braûre cuntri la fusion de Cjamare di cumierç di Gurize cun chê di Triest, nissune repliche ae siele delirante dai sorestants pordenonês di siele il Venet tant che compagn.

** Un martielament ai flancs continui e pressant in spiète di molâ il ko. ■

Ricors cuntri dal Italicum, la leç elettorâl che e fâs dam al Friûl, tal cidinôr di ducj

Walter Tomada

Al è stât il prin a fevelâ dal Italicum tant che di un probleme politic: za tal mê di Mai dal 2015, cuant che nissun ancjemò al fevelave di chest argument, Federico Simeoni al à presentât in consei provinciâl un ordin dal di che al fevelave "di une discriminazion injustificade de minorance linguistiche furlane". E cumò, tal cidinôr di dutis lis fuarcis politichis che no rivin a justâ i dams evidents che cheste leç elettorâl e provocarà ae rapresentance dal popul furlan, il conseîr autonomist di Palaç Belgrât (vicin al moviment Patrie Furlane) al à decidût di passâ a une forme diferente di azion: un

Un cîl cjamât di nûi lu à vaît, adun cu la sô int di Cjargne. Chê Mari dal Friûl che al veve sielt 43 agns indaûr par puartâ indevant la sô mission di pastôr, dulà che invezit dispès i predis a vignivin mandâts a purgâ plui che i pecjâts, il no jessi masse in sintonie cu la jerarchie.

Par bon signôr Laurinç Dentesan, plevan de plêf di Sante Marie in Guart, nassût a Bicinins ai 14 di Lui dal 1941 e mancjât tra vinaris ai 11 e sabide ai 12 di Setembar di chest an, invezit chei paisuts su lis monts a jerin diventâts la sô vite. Un percors di fede e di umanitât scomençât e puartât indevant cun cussience e passion. Cjamingant simpri tal mieç de int e dividint la strade cun pre 'Sef Cjargnel, compagn di scuele e di tantis bataiis, che cumò al reste a frontâ il vueit lassât di un om che pe sô energie, pe sô presince, pal so jessi cussî sclet al mancje une vore.

La plêf di Sante Marie in Guart lunis ai 14 e jere stracolme di int, la tô int, la tô famee.

Tra lis lagrimis però plui di cualchidun o pensi che al vedi imaginât il to coment ae fin di un funerâl celebrât par talian. Cuiassà ce che tu i varessis dit a un vescul che, tra lis tantis bielis e meritadis peraulis di memorie e laude pal to impegn di pastôr, no si è "impensât" di dî nancje un "et" par dute la fuarce spindude par fâ in maniere che la lenghe furlane no sedi lassade fûr de glesie, par che e vedi chê dignitât che i sorestants ancjemò in di di vuê a dinein. La fadie par vê in lenghe furlane la Bibie, il Lezionari, il

Cungjò, pre Laurinç

Christian Romanini



DENTESANO INTUN DISSEN DI GIOVANNI DI LENA

Messâl, la riscuvierte dal patrimoni dai cjants patriarcjins... tu e pre 'Sef jal vês raccomandât ancje a Pape Francesc, ai 18 di Jugn di chest an, cuant che cun altris predis us à

ricevût a Sante Marte in ocasion dai vuestris 50 agns de ordenazion... Ma si viôt che in borc di Trep forsît no soffe l'air dal Concili Vatican II.

Juste un an indaûr, propit tu tu

vevis ricuardât chê messe dai 28 di Avost dal 1974. Adun cun chei altris amis di Glesie Furlane, pre Checo, pre Antoni e pre 'Sef prins di ducj, o jeris vignûts vie di Zui parcè che no us vevin permetût di celebrâle par furlan. In Guart par fortune almancul pre Loris al à cjantât il Vanzeli te nestre marilenghe, ma se tu fossis stât tu daûr di chel altâr, dal sigûr no sarès lade cussî.

La tô vite e je stade la declinazion concrete de Glesie Mari di Aquilee: une 'rusticitas' di peraulis scletis e fats concrets. E se ancje il vescul di Rome al à raccomandât che la Glesie e à di tornâ a cjapâ sù l'odôr des sôs pioris, dal sigûr chê raccomandazion no ti vignive a ti, che fin dal principi tu âs metût in pratiche di par di chel "restâ cu la int", par une Glesie incjarnade fin insom.

Cumò che tu sês tornât te cjase dal Pari e tu âs tornât a cjatâ pre Checo, pre Toni, la tô int, tegninus une man sul cjâf e stânus dongje par che i tiei insegnaments di vite e la tô grinte nus segnïn ancjemò la strade, come chel salustri che tal cimiteri de Plêf nus à scjaldâts sot di tante ploie, e che o ai sintût tant che un to salût e confuart.

Al è uman e comprensibil domandâsi parcè che ti à puartât vie, ma inmò plui just e cristian al è vê agrât al Signôr par vênus dât la grazie di dividivi un toc di strade insieme. Mandi, pre Laurinç. ■

A pagine 10, un altri ricuart di pre Laurinç e un scrit di pre Toni dedicât a lui. ■



ricors. "O larin al Tar par sostignî fin da pît la nature incostituzionâl e discriminatorie di une leç che e je une violazion no dome dal drit talian ma ancje di chel european. Di fat, la Convenzion pe protezion des minorancis e previôt che i Stâts che le sottoscrivin no ledin a diluî la concentrazione des minorancis in tiermins elettorâi, parcè che e va tignude di cont e sigurade la lôr rapresentance politiche".

FRIÛL CREVÂT IN DOI

Chest al è propit il contrari di ce che al è sucedût cul Italicum "che al à çoncjade in doi la comunitât furlane", crevant pal mieç il Friûl storic e ancje la cussience identitarie di une popolazion che forsît le steve za pierdint di bessole. "Ma a colps di leç, di Macroregions e di citâts metropolitane taiadis su misure par (al va indevant a pagj. 11) ■

Par cui che al vûl contribuî a lis spesis pal ricorso, al è un cont corint di pueste cul iban: IT 96Y 08375 63710 000000 708611 intestât a "Patrie Furlane". Segnâ la causâl "Ricorso Italicum" insieme a non e cognon e comun di residence.

CJAMARIS DI CUMIERÇ: la oligarchie di Pordenon e la sô “boutade” antifurlane

Oscar Puntel



Miôr Vignesie che il Friûl. La *solite* anime antifurlane che e sabore su Pordenon e che e je in mans ae *solite* borghesie industriâl (za in passât, cu la puce sot dal nâs par dut ce che al è furlan e à sparnciât la ultime gnove in teme di agregazion fra Cjamaris di cumierç de regjon, come che al proviôt un specific dissen governatîf, par taiâ lis spesis e rindi plui eficients i servizis ae impresis. Cussì, bot e sclop, si ven a savê che te sentade dai 14 di Setembar, la Zonte de Cjamaris di Pordenon e à deliberât ae unanimitât di “invîâ une istance aes cjamaris di Cumierç di Gurize e Triest (che za si stan federant par lôr cont, ndr) par metisi intun unic Ent. In câs di rispueste negative o mancjante, a sarâ inviât il stes invît ae Cciaa di Vignesie”. Il test tra virgultis al è cjapât fûr dal comunicât stampe inviât propite te stesse dì. E a stret zîr, al è rivât il “raus” di Gurize: propueste dineade.

SPIRIT ANTIFURLAN? Al va dite che, stant al riordin che si pensave, Gurize cun Triest di une bande, Udin e Pordenon di chê altre – un riordin che al veve almancul une sô logjiche tune continuitât teritoriâl e di vicinace aes impresis – Pordenon si è simpri mostrade cetant stiçose. Forsit la pôre di sparî, mangjate di Udin (e dal rest nol è che finint cun chês altris dôs la mignestre e cambi masse). Forsit la pôre di pierdi cjadreis e rappresentativitât (e dal rest la razionalizion e je la fin de operazion). Forsit chel spirit antifurlan, a sô volte fi de “borghesie venite di “Pordenone città”, dispès imigrade tai agns Sessante de provincie di Trevîs, in grazie dai tancj puesej di vore che la Zanussi a veve creât”, cemût che al à vût dite Paolo Fontanelli, president dal Comitât pe Autonomie e pal Rilanc dal Friûl, che si domande ancje se chê stesse borghesie e sedi quartevôs


des istancis di dut il Friûl di là dal Tiliment e no dome di un bocon. “A Pordenon a varessin di cjalâ oltri la ponte dai pîts, ricuardant che l'obietif al è chel di rapresentâ dute la Provincie e no dome il centri storic dal cjâf lûc”, al à zontât Fontanelli.

DELIBARE FÛR DE VADE. Tai efets, la delibare de Cciaa di Pordenon no je stade chê grande cjatade. Ubaldo Muzzatti, di Cordenons, cognossût tal mont culturâl e par passe 20 agns consulent tecnologic e di organizazion aziendâl, al à vût scrit al Messaggero Veneto su la cuistion: “Mi domandi se chei che a volaressin fâ “at di dedizion a Vignesie” si rindin cont des dificolitât logjisticis e dai cosej in plui che a saressin cjamâts sui utents di Pordenon e di chel toc di Friûl. E ce di dopo de “mosse a cjava” par saltâ la casele Udin e cori cun Gurize e Triest? Sino sigûrs che utents e associâts, in grant part dal teritori e no dome de citât, a saressin contents di jessi separât dal lôr ambit naturâl, ven a stâ il Friûl?”

ISOLAMENT. Te *realpolitik* dai ecuilibris istituzionâi, la Cciaa di Pordenon si è di fat autoisolade. La volontât di unîsi a Vignesie? “Une boutade”, al dîs il president dal ent di Udin, Giovanni Da Pozzo. “La leç no proviôt unions fûr dai confins de regjon e cumò Pordenon al varâ di gjestîsi une situazion che si è creade di bessole”. Udin al podarès ancje continuâ a esisti cence unîsi a nissun, in virtût des deroghis pes provinciis di confin. “Ma nonostante chest – al zonte Da Pozzo –, nô no vin mai metût palets o firmâts documents che a previodevin prime un percors di union a doi par po rivâ a dome une Cciaa regionâl”. Di Palaç Morpurgo, insome, a disin che lis quartis a son simpri viertis, ancje pal fi prodic. Dome che il fi prodic si jere ravioldût. Chi, invece, o sin ancjemò lontans. ■

IL GNÛF PLAN ENERGETIC REGIONÂL. I numars e il futûr de Regjon in chest cjamp

Antonella Lanfrit



Trop i mancjial al Friûl-Vignesie Julie par jessi autosuficient dal pont di viste energetic? E in cont di energie che e rive dal soreli, de aghe, dal aiar, dai refudums, in sumis des fonts rinovabilis, cemût isal metût? Indaûr o indevant rispjet ai travuarts europeans?

A son cualchidune des domandis di fonde che si puedin fâ par scomençâ a jentrâ tal complès e articolât Plan energetic regionâl, l'imprest che la Zonte e in particolar l'assessor al Ambient Sara Vito, e à metût adun par rivâ a fâlu bon in vie definitive drenti dal an. Cun di fat, daspò jessi stât aprovât in vie preliminar de Zonte tal mès di Lui stât, propit in Setembar al è passât pes mans di tancj di lôr – dai sindicâts ai ordins dai professioniscj, par no dî des sociis che si interessin di ambient – cul intindiment di cjapâ sù dutis lis osservazions par rivâ a un imprest bon di segnâ in positif i prossims agns de regjon in chest setôr.

DEFICIT DI ENERGJIE, MA SOT DE MEDIE TALIANE

Po ben, tal Rapuart ambientâl fat de Regjon tal mès di Mai di chest an e che al compagne il Plan – un document penç cun 50 misuris praticis puntuâls e 31 schedis – si cjantin ducj i numars de situazion di dulà che si partis: tal 2013, la ultime ricognizion disponibile, il Friûl-Vignesie Julie al veve un deficit di produzion regionâl di energie dal 8,8%, che duncje si à di impuartâ. Une mancjance un pòc plui basse de medie taliane che e je dal 13,2%, stant al rapuart sui “Numars statistics su la energie eletriche in Italie” realizât di Terna.

La plui part de energie e ven dai implants termoeletrics, po dal idroeletric e dal fotovoltaic. In chel an, i consums a son stâts di 9.603,1 GWh con 7.827 kWh par abitant, che e je la medie taliane plui alte, soredu pe manufature, in particolar

pe siderurgjie. Ancje in regjon il setôr che al “mangje” di plui energie al è chel de industrie e daûr al ven il terziari, po la vite in cjase e la agriculture.


DI DULÀ CHE E VEN LA PRODUZION

La produzion di energie eletriche chenti e je di 9004,8 MW e di cheste il 5,4% al è di fotovoltaic, 19,5% di idroeletric 75,2% di termoeletriche. La incesite de potence dai implants eletrics di gjenerazion dal 2012 al 2013 e je lade sù dal 2,68% e la incesite di potence che si à vude dal 2008 al 2012 e je stade “cuasi dal dut” in grazie dai gnûfs implants fotovoltaics. In chei 4 agns, la energie rinovabile in regjon e je aumentade dal 40%: al ven cussì cjapât l'obietif di mieç par jessi in linie cun ce che la Europe e impon pal 2020.


OBIEÏFS

In cheste suaze, cuâi i obietifs si ise

La produzion di energie in F-VJ



Il deficit di autosufficiencia energetiche



Dâts dal 2013

©La Patrie dal Friûl

dade la Regjon, tignint cont ancje des regulis e dai precets nazionâi e europeans, e cuâi i trois individuâts parrealizâju? La idee, e à dit l'assessor Vito, e je chê di une “bio regjon”, intune vision “transfrontaliere” e in linie cui obietifs di “Europe 2020”, che a previodin la riduzion dal 20% di gas te atmosfere, la riduzion dal 20% di consums eletrics e la produzion di almancul il 20% de energie che si à dibisugne par mieç di energie rinovabile.

LA RIDUZIONE DES EMISSIONS

Si vûl, e à spiegât ancjemò Vito, “ridusi lis emissions dai gas che a provochin mudaments ambientâi e ridusi ancje i cosej energetics midiant di trê azions: efficientament energetic, doprâ di plui fonts rinovabilis, svilupâ la cognossince e la inovazion”. Tal stes timp, si è dit formalmentri “no” a cierts interventis: no al rigasificatôr di Zaule e al eletrodòt talian-sloven Udin Ovest-Okroglo, superâ la centrâl a cjarbon di Monfalcon e no al eletrodòt Somplât-Wurmlach, almancul che nol sei sot tiere.

Tal câs di un piçul rigasificatôr, in spiete de Valutazion di impat ambientâl dal ministeri, “bisugne viodi ben lis consequencis su ambients e trafics – e à dit Vito –, cence prejudizi, ma ancje ricognossint che dongje di aspjets interessants a son chei problematicis”.

VOTAZIONS

Tal troi di confront cul teritori, il Plan energetic regionâl al à bielzà cjatât il bon acet dal Consei des autonomiis, par vie che Comuns e Provinciis lu an aprovât cun 11 vòts a pro e 3 astensions, i Comuns di Gurize, Ruvigne e Tarvis. I sindicâts, Cgil, Cisl e Uil, invezit a àn solecitât “une proiezion dal impat dal Plan sul cost de energie e su la ocupazion, che se nol è chel al devente difilic dâ una valutazion tal complès dal document presentât de Regjon”. ■

Referendum par vê une Regjon Friûl- Triest, ma no dome: i cuesîts a saran cuatri

Walter Tomada



A saran cuatri i referendum che il comitat "Tutti per il Friuli" al proponarà ai citadins par lâ a tamesâ la lôr volontât di dâi une gnove muse a cheste Regjon, separant Triest e il Friûl e fasint di lôr dôs provinciis autonomis. Lu conferme il sindic di Rivignan Teor Mario Anzil, che fin dal inizi al è stât il coordinadôr di cheste iniziative che simpri plui furlans a viodin cun interès: "il jutori che nus stan dant in tancj al è il plui biel sburt che si podarès vè", al dîs Anzil, che al conferme che "intai mêis che a vignaran, o larin a scrivi par ben i cuesîts referendaris. Che a saran cuatri, doi abrogatîfs e doi propositîfs, parcè che la idee dal Comitât e je stade fin dal inizi no dome chê di oponisi a alc, ma chê di costrui".

ADESION DI BANDE DE SOCIETÂT

La sielte dal Comitât e je stade fin dal inizi chê di viodi se de societât furlane e vignive une adesione di fonde aes ideis proponudis: prime fra dutis, la istituzion des dôs provinciis autonomis, ma ancje la fissazion di un limit aes indenitâts di ducj chei che a son paiâts cun bêçs publics in cheste Regjon. "Un dai referendum abrogatîfs al rivuardarà propit chest aspjet, par eliminâ la pussibilitât che a sedin dirigjents di realtâts tant che Mediocredito o Aeroporto che a vuadagnin plui di Mattarella o di Obama". "O vin pensât - al scelarîs Anzil - di individuâ tant che stipendi massim chel di 120 mil euros ad an pal President de Regjon. E nissun in ducj i ents publics e tes societâts partecipadis de Regjon al varès di cjapâ un franc di plui". Chest al sarà

un dai argoments dai referendum propositîfs.

ENTS LOCÂI

Il secont referendum abrogatîf al rivuardarà invezit l'asset istituzionâl de Regjon e duncje la leç sui ents locâi che e je za argoment di un ricors di bande di plui di 50 sindics che si oponin ae costituzion des Unions Teritoriâls Intercomunâls. "Chel però che dal pont di viste de scritture dal cuesît al è il plui difencil dai cuatri referendum - al spieghje il sindic di Rivignan - al è chel dulà che si va a proponi lis dôs provinciis autonomis. Parcè che si trate di fâ stâ suntune schede une gnove interpretazion di chel Statût di Autonomie che a son coventâts sfuarçs une vore grancj di tantis inteligjencis par scrivi inte maniere che o podin lei cumò".

SLARGJÂ LA RÊT

Ancje il Comitât al à lis sôs inteligjencis: ancje se al scuen fâ di bessôl, cence grandis risorsis, lis colaborazions cul mont de Universitât, dai ordins professionâi e des associazions no mancjin. Ma al covente slargjâ ancjemò la rêt dai voluntaris. "Nus sarà util intal moment di cjapâ sù lis firmis": che no son tantonis (15 mil) ma a van cjapadis sù in poc timp. "O varin cuntri tancj esponents dai partîts ma il president de Provincie di Udin Pieri Fontanini nus à za sigurade la disponibilitât par judâ te certificazion des firmis, e tancj conseîrs comunâi di listis civichis par sigûr nus judaran ancje lôr". Obietîf: lâ a votâ tal 2017. E il Comitât al fasarà di dut par rivâ a chest travuart. ■

A Tumieç, un contentin pal tribunâl

David Zanirato



"Il Tribunâl che ducj a volevin salvâ", a titolavin su pe Patrie di Setembar dal 2013. A son passâts doi agns di cuant che i uficis judiziaris di Tumieç a son stâts sierâts par vie de riforme de ex ministre Severino che e à riorganizade la gjeografie dai tribunâi in Italie, e ce isal sucedût? Lis promessis che di mêis in mêis a rivavin di un grum di politics no son dal sigûr stadis mantignudis, pues crodi. Masse pîts di pescjâ, masse pocje fuarce di tratative a nivel roman. E, in fin dai conts, par Udin al va ben cussì.

JUSTE UN ALC

Alc però, par dî la veretât, al è stât fat. In grazie di un acuardi tra la presidente de regjon Serracchiani e il ministri de justizie Andrea Orlando, ae presince dal sindic di Tumieç Brollo, si è rivâts a otignî tes setemanis passadis l'impegn a vierzi un Sportel di prossimitât pes praticis judiziaris tai uficis dulà che a cjatavin spazi magistrâts e avocats. La Regjon e metarà a disposizion i locâi, dulà che dopo al rivarà personâl regionâl za comandât cul compit di dâ informazions, ricevi e trasmeti documents al Tribunâl di Udin.

IL VINARS DES CONSULENCIS

Tal stes timp, ancje i avocats dal ex foro tumiecin si son dâts di fâ par ufrî in maniere gratuite al citadin un apontament setemanâl, il vinars, dulà che si pues cjatâ informazions par cualsisei pratiche o assistenze legâl. Viodarìn se chest sportel al cjaparà pît e soredut se pardabon al sarà fat funzionâ. Intant però i disasis pe int che di dute la mont e à di rivâ jù a Udin par causis e rognis cu la justizie a continueran... ■

PAN...em et circenses. L'aniversari des Frecis parsore il Friûl di Mieç

Comitât NO AMX (MDS)



DISSEN DI GIOVANNI DI LENA

Panem et circenses: o podarèsin fâ cussì il struc de manifestazion de Patulie Acrobatiche Nazionâl tes zornadis dai 5 e 6 di Setembar. Un grumon di int par viodi i avions di vuere che a coloravin il cil parsore il Friûl di Mieç.

UCIEI PERICOLÔS

A Visepente plui di cualchidun, che di PAN a 'nd à fin parsore i cjavei, al zirave cu lis scufis anti rumôr par podê "vivi" a cjase sô. In cheste fotografie si cjate la fonde dal NO dal comitat No AMX che dal 1993 si bat par vè un cil libar di chei uciei pericolôs e sporcaçjons.

Cui isal il "paron" de tiere? La int o lis servitûts militârs? Il 1989 al segne le storie, i blocs militârs e ideologjics si son fruçâts e tal nestri Friûl lis casermis che a varessin vût di fermâ la invasion bolseviche e presidiâ la tiere brusade che al sarès diventât il nestri mont, a son sparidis tant che la rosade al prin soreli.

E pûr, za tal 1967 te Mozion dal Clericât, si domandave al Stât Talian di considerâ l'impad che lis servitûts militârs a vevin sul teritori. Une elare di vuere sejofoiant che e profumave di reson di stât, ma no di reson di umanitât. La int no

veve futûr tun mont indulà che la imprese no veve spazi par vie dal mont militâr.

Chest toc di storie par dî che metisi cuntri a chê presince e je une des fondis de reson autonomiste locâl.

LA BANDE JUSTE

Nol è un sindic dai comuns di Basilian, Listize, Bertiûl e Codroipo che al vedi scrupulât il pinsîr se cjapâ la posizion dai lôr paisans e aministrâts o bati lis mans ai avions che a zirav su lis cjasis dai lôr paîs. La bande juste no je chê dai piçui, ma chê indulà che a son lis autoritâts che a vegnin fotografadis e metudis sui giornâi o telegjornâi. Cemût si puedial pensâ che a nivei pui alts al rivi il dirit di jessi tutelâts a cjase nestre?

SFOLÂTS

In chei dîs achî, i giornâi a àn puartade la notizia che par resons di sigurece a àn sfolât (a cjase dai parincj) une ventine di lôr de zone di pericol. Une amission di colpe, ma ancje di omission, parcè che za passantdoman nissun al cjaparà nissun proviodiment. Se o vês dubis, provait a passâ par Visepente, Bean o Vilecjaze, o lait a viodi la pagine Facebook dal comitat.

Mi àn vût dit che se a gjavin lis Frecis in Friûl nol reste pui nuie, jo o ai vût rispuidût che a chel pont za no àn plui nuie se no son stâts in stât di cirî une fonde storiche, culturâl, linguistiche e antropologjiche. Un om cence muse si cuvierzarà simpri di mascaris fabricadis di altris.

Par chel, nô o nin a Rivolt ogni prin sabide dal mêis, par visâ che li al esist l'om, une dignitât e une fonde fûr de propagande che infume dut, e che al prove a piulâ un NO tun mâr di SÌ. ■

LA SGRIFE

A OGNIDUN LA SÔ SFILADE

A Barcelone, pai 11 di Setembar - fieste nazionâl catalane - in strade passe un milion di lôr par domandâ la indipendence. In Friûl, i furlans a van in strade a miârs pes Frecis Tricolôrs e pe sfilade dai Alpîns...

Judâ insegnant a judâsi: lis ultimis ativitâts di «Aghe dal cîl»

Tullio Fari

Tullio Fabbro al è un volontari che al à vude une grande idee: lâ a insegnâ tai paîs puars li che a son problemis di sut, un sisteme par costruî in dome cinc dîs cistiernis pe aghe de capacitât di 16.000 litris. Si pues judâ il projet Aghe dal cîl-Agua del cielo cuntun impuart di cualsisedi cifre. Dutis lis specifichis pal viersament lis cjatais sul blog <http://www.agedalcil.blogspot.it> o su la pagine Facebook "Aghe dal cîl - Agua del cielo".

Ve chi la croniche de ultime fadie, contade propit di Tullio. (Redazion)



Cuatri cistiernis costruïdis cu la solidarietât di int semplice, che e lavore e e sparagne, che no si dismentee di ce che e jere e di ce che altre int e patis inmò ator pal mont. O feveli di cui che al jude la nestre associazion, par esempi chei di Muris in ocasion de sagra dal paîs.

O sin lâts in Argjentine, tal nord, te provincie di Salta, ospits di gnovis gjenerazions di furlans partîts inmò tal lontan 1872 e subit dopo de ultime grande vuere mondiâl, in periodis là che la nestre Patrie e jere siore dome di miserie e di emigrazion.

L'INCUNTRI

Eal è stât biel chest incuntri. Dopo tant timp, dome cun cualchi persone aromai in etât o vin fevelât te lenghe mari, ma il spirt, il snait che o vin cjatât tai fantats furlans nassûts in Argjentine nus à permetût di lavorâ cun facilitât e velocitât. O vin cjatât int responsabile che e à lavorât cun gust e voluntât. La nestre fortune e à volût cun di plui che doi di chesj a lavorassin cun merit dentri dal Ministeri dai Dirits Umans. Cussì, o vin vût l'onôr di jessi presentâts al Ministri Marianaela Cansino e ai siei funzionaris che a àn valutât il projet Aghedelcîl_Aguadelcielo.

O vin vude la sodisfazion di vèlu

viodût aprovât e metût in pratiche te seconde setemane de nestre permanence, costruïnt la prime cistiern dimostrative par une scuele elementâr che e veve dibisugne di une riserve di aghe te zone di mont dal Comun di Chicoana, a dôs oris di strade de citât di Salta.

IL LAVÔR

Il Ministeri al à dut l'interès a risolvi il probleme de provincie che e je une vore grande ma ancje cun grandis dificoltâts e, savint de nestre propueste, al veve za contatât trê cubiis di muredôrs di trê citadins diferents in mût di mandâlis a cognossi il nestri projet. Cussì, dopo un viaç di plui di 400 km, a son rivâts seneôs di imparâ e - ai 2 di Fevrâr di chest an - o vin tacât il cantîr. O vin lavorât, mangjât, zuiât di cjartis la sere e durmît dîr la gnot, simpri insiem, ospits de coghe Graciela di origjin andine, e di un om che al gjestive la scuele in chel moment sierade pal periodi di vacanze. Si sin cjatâts propit ben, cu la organizazion di Pablo Del Pin e di Fernando Martinis. Te joibe o vin ricevude ancje la visite de Ministre e di Gianfranco Martinis, president dal Fogolâr Furlandi Salta, intant che o jerin impegnâts a tirâ sù lis parêts de cistiern. Sabide ai 7 di Fevrâr, aes 3 dopomisdì, o consegnadis lis clâfs dal lochet de puarte di jentrade de cistiern finide. Si sin saludâts cun strentis lungjis e sintudis, cu la promesse che o varès mandât lis risorsis par paiâ i materiâi di costruzion par altris trê cistiernis di fâ sù, une par ogni comunitât di indulà che i trê gruputs a vignivin. In chestis setemanis di Setembar dal 2015, cun cundizions climatichis plui indicadis, a tacaran i lavôrs sot la coordinazion dal Ministeri che par cheste opare al à incjariât Pablo Del Pin par organizâ dut. Par nô, tant ben che mai!

GRACIAS A MURIS

Cun di plui, par bocje de Ministre Cansino, vie pe conference stampe o vin vude la conferme che il Ministeri al à metût in program di sburtâ il projet tes zonis là che la sut si fâs simpri plui grivie par vie dai cambis climaticis dai ultins agns.

Il prin graciis cumò al va a dute la int di Muris e a chê che e à partecipât ae fieste, che cu la sô solidarietât nus à permetût di realizâ il projet "Aghe dal cîl" in Argjentine.

Nô o lin indevant cul lavôr, visant che la prossime destinazion e sarà in Ecuador te periferie de capitâl di Quito. ■

Riforme sanitarie regjonâl, e va indevant la bataie


David Zanirato



Si tache a jentrâ tal vîf ancje tra Tumieç, Glemone e Sant Denêl. La riforme sanitarie regjonâl che ca sù, plui che di ogni altre bande, e je stade criticade e combatude, e je daûr a movi i siei prins pas. Il diretôr gjenerâl de Aziende sanitarie n. 3 "Friûl de Alte-Culinâr-Friûl di Mieç" al conferme che, par esempi, tra i trê ospedâi si stan bielzà coordinant i medis par podê impostâ il lavôr dai gnûfs reparts e meti in at i cambiament proviodûts de leç in fat di riconversions. O ricuardin che se Tumieç e Sant Denêl a restaran ospedâi di rê, Glemone e vignarà impegnade pal potenziament des riabilitazions dai lunc degjents, pe medicine pal sport, pai ambulatoris specialistics (cardiologie, oncologie, gjinecologie, diabetologie, oculistiche, e.v.i.). Un prin dât positîf di chestis novitâts al rive par esempi dal personâl: dal procès inviât de Region pe mobilitât dai infermîrs, la zone a nord di Udin e je stade tra chês plui atrativis. Ancje diviers primaris a àn decidût di movisi, acetant la gnove sfide. A Glemone in particolar però i Comitâts a continuin la lôr bataie par difindi il Pront Socors che si dovarès trasformâ intun pont di prin intervent, cussì come che a stan lant indenand cul espost in Procure che al met in lûs i miôr criteris di antisismicità dal "Sant Michêl" respitet a ducj chei altris ospedâi de Region. Ancje il plan des emergjencis nol plâs trop, cence contâ la storie dal elipuart dentri dal ospedâl che nol ven utilizât dal 118 perchè che nol sarès a norme. ■

Il menau di Çurçuvint: fâi cuintri ae crisi restant in Cjargne

Marta Vezzi



Vivi in mont al è simpri plui dificil: no je retoriche, ma realtât, ma si pues ancje siei di restâ.

Simone Turco, 25 agns, di cuasi doi agns al fâs il menau. La sô e je une siele corajose: al jere sot paron e par colpe de crisi al è restât a pît cul lavôr. Dopo doi mês che al jere a cjase, lu veve cirût une dite par lâ a lavorâ lontan: al sarès tornât dongje dome 15 dîs ogni 3 mês di lavôr e al varès vût une buine paie. Ma Simone al veve za alc altri tal cjâf: diventâ un menau. Al à tirât dongje un pôcs di impresj e planc planchin al à tacât a fâ i prins lavoruts.

ILLAVÔR "Mi occupi totalmentri dal bosc - al conte Simone - dal tai dal arbul ae vendite. O lavori ancje par altris ditis, magari fasint dome il tai dal legnam, o dome puartantlu fûr te strade. Vint esperience cul escavadôr cualchi dite mi clame. O lavori pai privâts e pes grandis ditis. O ai provât a proponimi tal gno Comun di Çurçuvint ma no ai vût bon esit.

Al comun i vevi fate une propueste che nissune imprese e pensars di fâ: se o vês manutenzion di fâ di stradis, mîrs, murets, acuedots, slacs, oparis mistis, jo mi furnis cun dut ce che al covente e o fâs i lavôrs e invezit dai bêçs mi paiais cul legnam. Mi è stât rispuidût che no si pues. O ai domandât se o podevi vè in gjestion un bosc: mi àn dit che no vuelin. Mi sei proponût di netâ la strade di mont ma il comun mi à rispuidût che si ocupe la protezion civîl; di netâ la nêf a clamade, ma mi àn dit che nol è pussibil. Ancje se in altris comuns si fâs. Nol è nuie meti in pîts une imprese: il dificil al è fâle cressi perchè che, magari cussì no, nissun ti da une man. A disin che ur van

incuintre ai zovins: e je une marea di balis. O sotscrîf ce che ti dîs. Parcè che plui che a dâti, fale chei cuatri che ti cognossin, a son ducj prontos plui a gjavâti alc."

UNE ZORNADE CHE NO FINÏS AES CINC "E po tancj sacrificis: no esistin sabidis o domenis, ploie e soreli. Nol esist che un menau al puedi lâ a Lignan il mês di Avost. Ciert: sot paron o fasevi il gno e cuant che a jerin lis 5 o lis 6 o vevi finît, o cjolevi la machine e magari prime di rivâ a cjase mi fermavi cui amîs a bevi l'aperitif. Cumò o finis aes 5-6, o ven a cjase e o ai da preparâ la robe pal domans, telefonâ a chei che mi àn di dâ i bêçs, telefonâ a chei che mi àn di dâ robe, in pratiche proviodi a dut: al comence il secont timp de mê zornade lavorative."


TIGNÏ DÛR Ma Simone al cîr di tignî dîr, parcè che al è tacât ae sô tiere, ancje se a pene scomençât al pensave che al fos plui facil jentrâ tal zîr: "Fin che o rivi a pari no mi lamenti, dal moment che o larai a rimeti i pensarai sore. E che no mi si disin che i zovins no àn voie di fâ... Cumò o stoi tacant a ocupâmi ancje di lens di brusâ: dal bosc a cjase tô."

La Cjargne, par Simone, e reste il teritori plui biel di Italie e il puest dulâ podê inmò tentâ di vivi e, parcè no, di lavorâ. La uniche pecje e je la mancjance concrete di un poc, di un jutori pai zovins che come lui a cirin cun fadie e cun fuerce di volontât di no molâ. Ma puèdial bastâ par lâ indevant?

Direzion mail: utilizzazioniboschive.st@gmail.com
Cel. 3405034793 ■

LA CRISI DI VOCAZION DAL SINDACÂT E LA REGJONALIZAZION CHE JE PAR RIVÂ

Linux



No corin bieî tîmps pal mont sindicâl in Italie, e in Friûl forsit – simpri pe tradizional, native vocazion a fâsi mâl di bessôi – a son ancjemò piês. A nivel nazional, il president di Confindustria Giorgio Napolitano, lant daûr des olmis dal stes president dal Consei, Matteo Renzi, al è sostignût che tra i plui grancj responsabii de situazion di cumò dal Paîs al è il sindicât che “in Italie in medie – lis sôs peraulis testuâls – al è un fatôr di intart, al à fat intardâ une vore l’modernament e la efficienze complessive dal Paîs”. Esimprianivel nazional, a fâ ancjemò plui delicate la posizion dal sindicât, ciertis sieltis “ad personam” di ex esponents di prin plan des organizacions sindicâls che, adeguantsi i compens, a an dât dopo la distrope a dute une serie di polemichis che, a cjadene, si son “butadis jù” sul territori.

ISTÂT CJALT E cussì, dilunc dal Istât, i esponents sindicâi apicâi de region si son cjatâts a vê di fâ une ativitât di trasparenze sui compens cjapâts, su la onde dal pinsîr dal pericol di podê pierdi credibilitât viers dai iscrits. Che su chei, par altri, si podarès vierzi un altri front di discussion, stant che aromai – compliç l’inevçjâ de popolazion e i tancj puecj di vore pierdûts intai vot luncs agns di crisi internazional – a son in maiorance pensionâts e duncje cun esigjencis di “rappresentance” ben diversis di chês “tradizionâls” dal sindicât.

A complicâ ancjemò di plui il cuadro, il “scandul” di Vile Russiz, cu la Region che e à decidût di inviâ ducj i ats relatîfs ae gjezion de Fondazione (che in chel Cda asentavin ancje rappresentants sindicâi) ae Cort dai conts e ae Procure, dopo che a jerin vignudis fûr indicazioni che a lassassin capî une gjezion no françe di favoritisms e di vantaçs.

CREVADURE Di ultin, ma no di mancual impuartance, la crevadure che si è evidenziade dentri de Cisl dopo de bolade di bande dal Consei di Stât dal eletrodut Redipulie-Udin Ovest: se il segretari regional Giovanni Femia, compagn dal so omolic de Cgil, Franco Belci, al à difindût la impuartance de opare,

il segretari de Cisl Udin e Basse furlane, Roberto Muradore, al è sostignût inveçit che di energjie in region indi è a suficienze e che forsit l’unic probleme al è chel di “tornâ a modulâ” la fruizion in maniere di no penalizâ la energjivore Abs (Grup Danieli) di Cjargnâ, che sul sît furlan – dopo tantis vôs di pussibil “stramudament” tal forest – e à invistît milionadis di euros intai ultins agns.

TAIÂ E... UNÎ Insume, no un biel moment. Ma dut chest al riscje cuasi di fâ passâ in secont plan, scurît di pôris di pierdite di credibilitât e di polemichis, un altri aspjet: la “regjonalizazion” di grandis categoriis dal sindicât che, cjapât dentri chel stes cu la crisi, al cfr di “taiâ” i coscj e di razionalizâ la proprie struture. Sacrisant, si podarès dî, e di là di dut un esempli concret di impegn inte lote aes straçariis. Al reste però di capî cualis consecuençis al podarà vê dut chest su la capacitât di rapresentâ il territori e i siei interès, su quale che e sarâ la capacitât di incidi su lis variis situacions aziendâls.

Se il model di contratazion al larâ simpri plui inte direzion, vuê prevalente, di leâ i salaris ae produtivitât e ai risultâts, il sindicât al podarès pierdi altri rûl e viodisi cjapât il puest di une tratative direte tra lis parts, une volte sigurade la contratazion di prin nivel. A chel pont, parts di territori e aziendis plui debilis a lassassin a pericol di diventâ “ricatabilis”.

TORNÂ AI VALÔRS FONDAMENTÂI Par chest forsit, al sarès plui oportun che il sindicât al tornâ a fâ pardabon il sindicât: bon di elaborâ un dissen strategjic di disvilup e di cressite – metint di bande i interès di buteghe – par dute la region e pai siei territoris, combatint par difindi i dirits dai lavoradôrs e di cui che in Friûl al vîf – soredut intes zonis plui disasiadis –, e cuntune presince capilar intes aziendis. No dome ai fins rivendicatîfs, ma soredut par tornâ a jessi chel termometri in stât di valorizâ la vere ricjece di chest territori: il lavôr. ■

L’impegn di une racuelte di firmis par sostignî une leç par un fisc ecui e solidâl

Di Paolo Mason, Segretari CISL di Udin



La CISL Nazional e à promovût la racuelte di firmis a poe di une “leç di iniziative popular” par un fisc ecui e just.

La Segretarie de CISL di Udin e à sielt di impegnâsi in chestes iniziative no tant e no dome intai lûcs di lavôr ma e à vût miôr lâ fûr des fabrichis e dai uficis par lâ a cjatâ i citadins furlans intes placis dal nestri territori.

La CISL e à organizât intai mês passâts desenis di presidis in concomitance cul davuelziment dai marcjâts tradizional che si tegnin in tancj paîs dal nestri Friûl.



LIS ADESIONS E IL DIALIC

La CISL, cussì, e à podût no dome racue ben 2.400 firmis in grazie ancje dai conseîrs e assessôrs comunâi che si son fats disponibii, ma soredut e à podût informâ e dialogâ cun personis che par abitudin no an nuie a ce fâ cul moviment sindicâl.

L’impegn de CISL suntuone cuistion vecje e impuartante come chê fiscâl al à cjatât un gradiment sclet, ancje se no son mancjadis criticis e moments di discussion vive.

Al è just e normal, dal rest, che il sindicât al stedi tal mieç de int e che al vivi in prime persone lis

soferencis, lis inrabiaduris, e che indi patissi i relatîfs bruts umôrs.

Ve, in sintesi, i obietîfs de iniziative.

Al va introdusût un bonus fiscâl di 1.000 euros anuâi pai contribuentis cun redit fin a 40.000/€, e un bonus decessint fin ai 50.000/€.

RINFUARÇÂ LIS SANZIONS

A van rinfuarçadis lis sanzions amministrativis e penâls, cressûts i controis, e va introdusude la segnabilitât dai paiaments e l’ûs des cjartis di credit par contrastâ pardabon la evasion fiscâl. Al è indispensabil che al aument de fiscalitât local e corispuindi une riduzion dal prelêf fiscâl nazional!

E je urgjence di une impueste cressinte su la ricjece nete di là dai 500mil euros, cu la escluson de prime cjase di abitazion e dai Titui di Stât.

POIE A CONSUMS E LAVÔR

In definitive, par fâ tornâ a partf la economie a van sostignûts i consums e il lavôr cuntune grande operazion redistributive di ricjece che e favorissi i lavoradôrs e i pensionâts, soredut di redit medi bas, e che, inveçit, e fasi paiâ plui tassis ae rendite mobiliâr e immobiliâr.

La Italie e je une Republiche. Rifondinle sul lavôr! Tacant di un fisc che al premi cui che al cree ricjece, che al sedi chest lavoradôr dependent, autonom, o altri.

Il nestri Friûl al è di simpri fondât su la onestât dal lavôr e no su la furbetât des speculacions e des jentradis. Tornin a partf di chi. ■

ANCJE CHEST AN SI FASIN LIS ELEZIONS DAL “PARLAMENT FURLAN” E LA CONSULTAZION NO SARÀ DOME DIGJITÂL



L’an passât al à fat cetant felvê di se il referendum digjitâl pe indipendenza e la votazion pal “parlament furlan” dulà che si an eletts 11 “parlamentârs” che a sentin in maniere ideâl inte assemblee. Chest an chei di Parlament Furlan, cussì si clame la associazion che e promôf la consultazion, a tornin a provâ: lis gnovis elezions si fasaran dal prin di Otubar fin ai 31 dal stes mês.

Cumò si podarà votâ ancje intai bossui fisics, ma dome in cualchi lûc: in principi i promotôrs a volevin distribuî i bossui intai bars e tes ostariis ma par cuistions di control dal vôt e par evitâ criticis sui vôts fals, a saran dome trê o cuatri ponts dulà votâ (dulà che i esercentis a an acetât di mandâ e di registrâ un document).

SI PONTE A UN AUMENT DAI VÔTS «Nol sarâ facil tornâ a fâ i numars dal an passât (plui o mancual 7000 vôts, n.d.r.)» al dîs Adrian Bion, un dai fondadôrs «parcè che chest an al è mancual ferment, l’an passât al jere une novitât e a jerin i câs in Scozie, in Catalogne e in Venet che nus vevin permetût di vê spazi sui media. Al sarâ plui difiçil, ma il nestri obietif al reste chel di passâ i numars dal an passât.»

La procedure di vôt e sarâ tant plui semplice, sperant che chest al judi a cressi i numars: l’an passât a jerin stâts problemis tecnicis che nus vevin penalizade la votazion.

Un altri obietif di Parlament Furlan al è chel di vê une sostanziose inçressite des iscrizions, che vuê a son plui o mancual 1200.

Chest an i candidâts a son 27, 16 in plui dal an passât: il Parlament che si formarâ al sarâ duncje plui presint sul territori e plui organizât. Ancje lis sentadis, che cumò a son cuatri voltis l’an, a devenaran dodis: une al mês. **DIALIC CUI PARTÏTS** Il Parlament al veve proponût a ducj i grups politics furlanescj di meti un propri rapresentant; ducj si son esprimûts in maniere favorevule su lis ativitâts dal Parlament, e cualchidun si è iscrit ancje, ma nissun nol à esprimût candidâts. «Al è un segn che la unitât dai partÏts e dai moviments e je ancjemò lontane» al dîs simpri Bion «ma o tornarin a provâ l’an prossim. Intant o sin daûr a valutâ ciertis novitâts impuartantis pai mês prossims.» ■ ♦ ♦ Redazion

Dulà lâ a votâ sul web:
www.parlamentfurlan.eu

Slovenie

In Italie cumò e je "la buine scuele", ma in Slovenie cemût ise la scuele?

Tjaša Gruden



Il prin di Setembar in Slovenie e je sunade la prime campanele dal an scolastic 2015/2016 e il so principi al à coincidût cuasi cu la fin dal prin an di lavôr dal guvier di Miro Cerar (ai 18 di Setembar). E je stade duncje cheste une ocasion ottime par analizâ la ativitât fate da singui ministeris, cjapât dentri chel de istruzion vuiddât di metât Mai di Maja Makovec Brenčič, nomenade ministri dopo lis dimissions, prime di Stanka Setnikar Cankar, e po dopo di Klavdija Markež (in cjarie dome pôcs dîs).

IASÛL In Slovenie i fruts a puedin scomençâ il cicli prescolastic (che al coineît cui asîi nîr e cu lis scuclis de infanzie) e frecuentâ i asîi dal compiment dal 11 mês. A pet de situazion in Italie, i asîi in Slovenie no sierin dilunc dal Istât. Ae fin dal an scolastic passât, i asîi slovens a jerin frecuentâts di 89 mil fruts, il numar plui alt fin cumò, cuntune percentuâl di inclusion dai fruts in etât prescolastiche dal 76,8%.

IL CICLI PRIMARI In aument continui a son ancje i arlêfs dal prin cicli scolastic, che al corispunt aes primariis e secundariis di prin grât in Italie e che al dure in complès nûf agns. Il numar dai arlêfs chest an al à fat regjistrâ un aument sensibil: a son di fat cuasi 173.960, sui 6 mil in plui a pet dal an scolastic 2014-2015. Di chescj, 21.807 a son i fruts iscritti al prin an. La tindince positive, daûr dai dàts dal ministeri, e varès di lâ indevant e rivâ cuasi ai 182 mil arlêfs intal an scolastic 2018/2019. Par ce che al tocje il program formatif, al è previodût tant che materie facultative il studi di une lenghe foreste pai fruts des primis classis. Dal an scolastic prossim il studi di une lenghe foreste al sarà obligatori invezit de seconde classe.

AE AVANVUARDIE PAI

METODIS Novitât ancje par ce che al tocje il gustâ sovenzionât dal Stât pai arlêfs. Fin cumò a vevin dirit al gustâ a gratis i fruts des fameis là che il redit pro capite nol passave il 18% de paie medie a net slovene. Dal prin di Zenâr la percentuâl e vignarà cressude al 36%, slargjant ancjemò di plui il numar di chei che a àn dirit e che, daûr des stimis dal ministeri, a varessin di jessi plui di 8.500. Il compens mensil net medi dai lavoradôrs slovens in Lui al rivave a 1.005,06 euros.

La Slovenie e je di agns tra i stâts de UE che a son, ancje in cjamp scolastic, plui ae avanvuardie par ce che al tocje metodis inovatifs: comunitâts virtuâls par insegnants, classis virtuâls, ûs di ordenadôrs, internet e altris struments tecnologjics. A son 710 i istitûts di formazion (cjapâts dentri asîi, scuclis e altris istitûts) che a son furnîts cun tecnologjii modernis. A son stâts cuistâts 2.265 ordenadôrs, 1.303 portatii e 113 proietôrs. Il 70% dai arlêfs e students slovens al frecuente istitûts che a àn a disposizion un colegament internet a fibre otiche (1GB/s la velocitât garantide). **RUSSACS PLUI LIZËRS** Cun di plui, za dal 2004, il ministeri al è daûr a c irî di ridusi il pês dai russacs e borsis dai fruts promovint la creazion di libris di test eletronics, aurint ancje ai fonts europeans. Cumò a son daûr a testâ 42 libris di test digjitâi, interatifs. Vincjecinc tra chescj a son stâts za confermâts. Pai students des scuclis secundariis e pai universitaris e je stade creade di pueste ancje la aplicazion mobile „eVŠ“ che ur permet di acedi a informazions sui programs di studi e su ufiertis particolârs che ur son dedicadis, des pussibilitâts di lavôrs pai students aes borsis studi. ■

Friûl Europe

Zornadis di lenghis, di dirits e di autodeterminazion

Marco Stolfo



Il mês di Setembar, che al è a pene finît, al ufîrî ogni an ricorencis impuartantis par cui che in Europe i ten ae diversitât linguistiche, al dirit ae lenghe e aes lenghis, al autoguvier e ae autodeterminazion. Al è il câs dai 26 di Setembar, che tacant dal 2001 e je la Zornade europeane des lenghis: une ocasion di riflession coletive che e tocje propit il pluralism linguistic e la cognossince e l'ûs di plui lenghis, tant che valôr culturâl, dirit di fonde e oportunitât educative, formative e socioeconomice.

Une altre date clâf e je chê dai 11 di Setembar. Par ce che al tocje lenghis, dirits e istruzion – lu ricuardavin un an indaûr juste ta cheste pagjine – al è l'inovâl di diviersis iniziativis cjapadis sù de bande dal Parlament european tai ultins agns. Tra storie, memorie e rivendicazions di identitât e di autoguvier, chê stesse zornade e je chê de "Diada", la fieste nazionâl catalane, e des mobilitazions a pro de indipendence de Catalogne. Cun di plui, chest an, in chê date si vierzeve la campagne eletoral pal vôt «autonòmic» dai 27 di Setembar, là che la sielte dai parlamentârs de Generalitat e à cjapât sù ad in plen ancje un altri significât, in continuitât cul referendum pe indipendence dai 9 di Novembar stâts, mai ricognossût di Madrid.

Tal moment che o sierin il giornâl, nus rivin lis primis informazions di Barcelone in cont dai risultâts: lis listis indipendentistis – di une bande il rassemblement 'Junts pel Si' e di chê altre la çampe alternative de Cup – a restaressin par pôc sot dal 50% plui un dai vôts, ma a varessin la maiorance assolude des sentis in


Parlament. In chestis cundizions, si puest fevelâ sei di vitorie storiche che di sucès smiezât. Chi di cualchi setemane si capirà miôr ce che al nas in Catalogne. Par sigûr a saltin fûr daurman doi elements: la petenade che a àn cjapade i partîts spagnûi e spagnolisej (Pp e Psc-Psoe) e il sucès invezit de Cup, che in confront cul 2012 e multipliche par trê la sô percentuâl e il numar dai siei rapresentants tal Parlament di Barcelone, tant a dî che la cuistion catalane e je ancje une cuistion sociâl.

Chê dai 27 di Setembar e je une date impuartante, che esa di Europe e di dirits, ancje pal Friûl e pai furlans. In chê date di vincj agns indaûr il Consei regionâl dal Friûl-VJ al faseve buine une prime version di chê che e sarès diventade la Leç regionâl 15 dal 1996 pe tutele e pe promozion de lenghe furlane. Chel test di leç al vignive fermât dal Guvier talian par vie che... al jere masse european, a tacâ di un riferiment masse fuart ae 'Cjarte europeane des lenghis regionâls o minoritariis', in chê volte nancje firmade de bande di Rome.

In chê ocasion la Region e rispuindeve aes obiezioni dal Guvier cun decision e cun diplomazie: il test al tornave in Consei e al vignive fat bon cualchi mês plui indenat cun cualchi modifiche di caratar formâl ma cence mudâ l'implant inovatf e european dal proviodiment. Di une bande al ven di dî che, magari cussì no, a jerin altris tîmps. Di chê altre, pe lontanance dal Stât talian respriet ae Europe dai principis di fonde e dai dirits, al somee che nol sedi cambiât nuie. ■

Païs Catalans: manifestazion moltitudinarie pe independence

Internazionalitari



Pe cuarte volte in cuatri agns, ai 11 di Setembar, i catalans a àn manifestât la lôr adesion al proget indipendentist e a àn jemplât lis stradis di Barcelone in ocasion de *Diada*, la fieste nazionâl de Catalogne. Cun di fat, centenârs di miârs di personis – un milion e 400 mil pe polizie locâl, doi milions daûr di altris fonts – a àn partecipât ae *Via Lliure a la República Catalana*, la manifestazion inmanee de *Assemblea Nacional Catalana e dal Òmnium Cultural*. Chest an la iniziative e à jemplât la Meridiana di Barcelone e lis stradis laterâls par passe cinc chilometris, ven a dî di Sant Andreu al Parc de la Ciutadella. Intun at che al voleve rapresentâ la vie democratiche pe indipendence, di concuistâ cul vôt, une grande frece e à scjavaçât dut il percors in direzion dal Parlament catalan par incjastrâsi intune grande urne dopo vè passât pes dîs tratis che a rapresentavin cun colôrs diviers i ponts di fonde de Republiche catalane che si vûl edificâ, o sei: ecuilibri teritoriâl, diversitât, solidarietât, vierzidure al mont, sostenibilitât, avualiance, inovazion, rinovament democratic, educazion e culture, benstâ e justizie sociâl. La manifestazion e je colade te zornade di vierzidure de campagne eletoral pes elezions catalanis dai 27 di Setembar consideradis di ducj un vèr referendum su la indipendence. ■



«THE BEST(IIS)»

IL LIBRI DAI GNOGNOSAURS!

No âstu ancjemò il libri dai Gnognosaurus? O lu âstu e vuelistu regalâ une copie a cualchidun altri? No stâ a pierdi la ocasion: **MANDINUS UNE MAIL PAR VÊLU A CJASE A**

info@lapatriedalfriul.org

Il presit al è di **6,80 euro** plui la spedizione di **1,20**: total **8 euro!** Al inizi dal libri lis lezionutis su cemût che si lei il furlan!

«Il lavôr di Dree Venier al è aromai un classic de leterature par furlan: i siei fumuts a judin a imparâ la nestre lenghe, ancje par cui che no le fevele. E magari, cu la scuse di judâ fis o nevôts, gjenitôrs e nonos si cjataran a lei insiemit lis aventuris dai **Gnognosaurus!**» (Pre Roman Michelot)

Une balade pe liende partide di Secuals e rivade insom dal mont: "Oggi è sabato sera" dai Leuq e Maurizio Mattiuzza

Moira Pezzetta



Pe prime volte insieme lis peraulis vivis de poesie a incuntrin lis notis folk, blues e gipsy par ricuardâ une liende furlane. Cul test dal poete Maurizio Mattiuzza e la musiche dai Luna e un Quarto, e je Jessude la cjançon *Oggi è sabato sera: ballata per Primo Carnera*.

Il plui voltis premiât poete e il grup dai siet di Muçane, vincidôrs dal Premi Friûl (2010) e di Suns (2013), a son vignûts fûr cuntun gnûf lavôr che al conte la vite dal lezendari pugil di Secuals.

LA IDEE

Dut al scomence di une idee di Mattiuzza di contâ personaçs che a àn fate la storie dal Friûl, e viodude la sô passion pal sport al decît di dedicâ il so timp a Carnera. "Scrivint dal campion, lis peraulis si fasevin sot come une cjançon, tant che a jerin za prontis par fâ une balade, cui elements che plui a caraterizin cheste forme poetiche: dal lâ sù, al mît, fin a rivâ ae colade". Al è cussì che Mattiuzza, che al dîs di vê une grande sintonie culturâl e umane cui Leuq, ur domande di musicâ lis sôs peraulis.

Il test "vîf, vocatîf, che al ricree emozions e circostancis" – nus conte Jacopo Casadio, vôs dai Leuq – al fevele di Primo, il personaç furlan che par prin al à vude une dimension internazionâl e che la sô storie e met dongje tancj temis diviers: dal Friûl ae Americhe, dal migrant, al pugil e al atôr.

Primo al è soredut l'emigrant furlan diventât il simbul de storie di tancj di nô che a son lâts pal mont. E al è ancje su chest che i autôrs a àn voie di fâ nus rifleti. Carnera al è un simbul de necessitât di lâ vie, tipiche dai furlans di chei agns passâts ma ancje une storie contemporanee.

"O sin sigûrs che come Carnera ogni dî al è cualchidun che al partîs", a àn scrit te buste dal disc.

OPERAZION LINGUISTICHE

In cheste balade, definide "noir", e je stade fate ancje une operazion linguistiche. Il test de cjançon al è polifonic: par furlan, talian e, in cualchi passaç, cuant che a fevelin chei che a scometin, al è in inglês, tal slang dai imigrâts americans.

La cjançon e fotografe la serade cuant che Primo al piert il titul di campion cuntri Max Baer. Il combatiment che al rapresente la fin dal mît e de glorie di Carnera.

I suns insistentis tant che pugns che a contin la biografie di Baer - *Carnera e il suo pugno che batte come un maglio* - a son intercalâts de musiche grâf e basse di cuant che al fevele Primo, sconfit, rivât insom de sô cariere di pugil, e si sint ancje il toc di une vilote tradizional furlane che e ricuarde la partence viers un destin lontan - *Cuant che jo o voi vie di culi, fin las pieras a vaiaran*.

ROS... AND ROLL


Onorant i discs dal passât de grande tradizion rock and roll e par creâ un ogjet "vintage" cuntun contignût estetic significatîf, i autôrs a proponin la cjançon cuntun vinîl colorât di ros. Tal lâ B dal 33 zîrs e je ancje une gnove version, plui lente e blues, dal toc *La stagion de rosade*, za presint intun vecjo album dai Leuq. Il disc, acompagnât de version in digjital, al è registrat sot de etichete Notecontinue.

Nol è di mancjâ aes prossimis presentacions de cjançon, dulà che i autôrs a ricrein un spettacul multisensoriâl cun tant di dissens, leturis, video ineditis de vite private di Carnera e si presentin in sene vistûts come tai agns Trente.

Par savê di plui su la band e sul poete, ma ancje par cîri i lôr prossims spettacui, visitait lis lôr pagjinis facebook: /mauriziomattiuzza?fref=ts e /Luna-e-un-Quarto-135571419817646. ■

“La gnot des plêfs”, par valorizâ un grant patrimoni

Alessio Screm



Lis plêfs de Cjargne a son lûcs di preieris e di storiis antighis, pleris di secui sore lis culinis, teatris di esistence di un popul. Là si batiavin i vîfs, si soteravin i muarts e si cjantavin lis laudis al Signôr. Tieris batudis dai pas dai pelegriins, glesiis di mont, ancje se lis primis testemoneancis a van indaûr bielzà al cristianisim primitîf.

E je tante storie tes plêfs, a son tancj tesours, bieleccis architetonichis, pitorichis, afrescs e altârs creâts cun art di mans artesanis, dai mestris cence non fin aes grandis firmis, tant che Domenico da Tolmezzo, Antonio Schiavi, Giulio Urbanis, Carlo da Carona.

Chestis plêfs a abracin disesiet secui di storie e a son - o a dovaressin jessi - un patrimoni inestimabil de umanità, no dome de Cjargne e dal Friûl.

Al baste pensâ che a Dieç, sot de glesie vecje di Sant Pauli, a son stâts cjatâts rescj di un lûc di cult di etât augustee, precristiane, vâl a dî la plui antiche testemoneance di plebs rurâl in Italie.

LIS MAGNIFICHS UNDIS

Undis plêfs fûr pe Cjargne, inte Val dal Tiliment, Val Dean e Val de Bût, dutis registradis intun elenc dal 1247 de Diocesi di Aquilee, cuant che a un ciert pont, par volontât dal Patriarce Bertolt di Merania, la int e à dovût paiâ la decime pal lôr mantigniment, vâl a dî un decim dal salari. Tra dutis, la plêf di Dimpeç intitulade a Sant Denêl no à vude une vite lungje, assorbide di chê di Soclêf tor dal secul diesim cuart.

Tantis storiis, tantis liendis che si slungjin e che a sorevin ancje tai tîps plui scûrs, come tra i secui sest e novesim, cuant che la Cjargne e jere savoltade di ordis migratoriis e di ocupazions profanis dai lûcs sacris, come chê di chê che e jere la basiliche di Davâr. Là si conte che la tor cjampanarie e podarès jessi un rest dal cjistiel di Agrons.

Plêfs misclîçadis a struturis fortificadis, dulà che a son passâts fûcs e taramots; rescj romans,

sacraris e relicuiis, cualchi plêf donade dal Patriarçjât ae Abazie di Mueç, ricostruzions e sistemazions di etât moderne, tante sugjestion.

SIMPRI VIVIS_O vivin ancjemò lis plêfs e o continuin la lôr storie, che e je la storie instreçade de lôr int e des lôr valadis, ven a stâi de nestre int e de nestre mont. Lôr a vivin midiant de preiere dai cjargnei e dai lôr plevans, intes celebrazions e fiestis religiosis, tant che la bussade des crôs a Sant Pieri di Zui, e ancje midiant di une schirie di propuestis culturâls e naturalistichis che a intindin valorizâlis. Un clâr esempi al è il Cjamin des Plêfs, un percors di vincj tapis che si pues fâ a pît o in biciclete, une trate che e vûl jessi un pelegriaç, motîf di riflessione spirituâl che al cjate il so moment plui cjalt cu la visite des plêfs, volint compagnâts di une vuide.

LA GNOT DES PLÊFS_A rindi plui vivarose cheste iniziative e je intervignude La lungje gnot des plêfs in Cjargne, une rassegne dute speciâl di musiche corâl a capele che e met dongje, intune sole zornade, dîs plêfs, dîs concerti e dîs degustazions di plats fats cun prodots dal teritori.


La prime edizion e je stade sabide ai 19 Setembar, par une lungje e tant frequentade zornade, scomençade aes 14 inte Plêf di Sant Florean a Dieç, e finide a miezegnot inte Plêf di Sant Pieri a Zui.

La cualitât dai còrs che a àn eseguît diviers repertoris di musiche sacre a capele, intai rivocs des antighis arcadis des plêfs, inte pàs di chês culinis, tai savôrs e inte bontât de cusine cjargnele, ufierte ae fin di ogni concerti, a àn fat di chê zornade una rinassite corâl di fradilance, ducj dongje di una mense condividue.

Lis plêfs a tegnin vicine la int: al è il motîf che a son stadis costruidis in secui e secui di cambiaments, par tignî intate la fede e la comunitât. Cjatâlis vuê inmò frequentadis e amadis, al è un grant e biel segn di sperance e di amôr. ■

Zodiac furlan

— Bete di Spere —



BELANCE

Nassûts jenfri i 23 di Setembar e i 22 di Otubar

Profum preferît: la broade.

Cun pocje originalitât, chel che al à inventât l'oroscop al à decidût che chei nassûts sot dal segn de belance a son personis ecuilibradis (o scomet che se invezit de belance al ves cjatade la costelazion dal orloi, a saressin stâts precîs e puntuâi).

A son ancje personis che i tegnin une vore ae justizie, a pesâ ben ogni decision (se a fossin stâts dal segn dal orloi, probabilmentri a varessin tignût une vore a no someâ vecjos).

Ah, e simpri secont di chel gjeni che al à inventât i oroscops, a chei de belance ur plâs ancje la bielece (strani: ducj chei altris a àn miôr lis robis brutis!).

Cemût si tradusino dutis chestis carateristichis intun furlan? Facil: la belance furlane e sta simpri tal mieç, e contente un pôc ducj. Tra il Tocai e il Merlot, par no sielzi, e bêt un tai di un e un tai di chel altri. Tra il frico e il muset, e mangje ducj doi; tra il schi di fonts e il schi alpin, si ferme in baite a fâsi una luanie.

Fevelant di bielece, il furlan nol è propit nassût par jessi artist, se o pensin a la art come a une robe creade dome par amôr dal biel (pierdi timp intune robe che no covente a nuie?

Ma stino scherçant?). Il sens artistic de belance furlane, alore, si tradûs te piture (chê dai mûrs di cjase, però), te scriture (de liste de spese o al massim di un articul di giornâl – e cumò provait a induvinâ il segn di Bete di Spere!), o ben te musiche (ma dome par inventâsi i còrs de curve dal Udin).

Sport: cul vuestri amôr pal ecuilibri, us consein il patinaç, la gjinastiche artistiche o ben di fâ il camarîr al Tenda di Lignan.

Curiositât: la belance e je la uniche costelazion che e rapresente un imprest inanimât invezit di un animâl o di une persone.

Il fat che e sedi une belance al dimostre che l'oroscop no lu à inventât i furlans, parcè che se no a varessin sielzât une costelazion a forme di vuazine. ■

IL GRANT LUNARI DAL FRIÛL OTUBAR

— Mario Martinis —



IL SORELL, LA ATMOSFERE, LA NATURE

Dopo vè passât la linie imaginaria dal ecuinozi de Sierade il sorell al va indevant a sbassâsi dilunc de sô parabule celeste di rive jù, fasint cussì calâ la durade dal di e cressi chê de gnot. Il sorell al spant i ultins clips e dapardut si intraven il rimplant de sô colade. La nature e marche la sô variazion cromatiche, tant che in chest mès i siei quadris vegjetâi si pandin come una grande palette di colôrs, prime vivarôs e slusints, po smavîts e flaps in spiete dal so impisuliment. I animâi a emigrin o a cirin lis tanis li che a laran in letarc tal lunc Invier. I paisaqs a son tocjâts des primis brumis; il plan e lis vals a puedin za cuvierzisi di fumatis, sul mâr a soffin buere e tramontane.

VORIS DAL CICLI AGRARI

Si fâs la seconde part de vendeme, di racuelte di pomis e di prodots de tiere, so redut patatis e blave, che a vegnin puartâts a cjase, ingrumâts e in part ancje trasformâts pe lôr conservazion. Grandis voris tai curtî e tes cjanivis pes operazions delicadis de vinificazion in graciis dal tratament atent des uis, dal control dal zucâr dai mosts, de lôr ebolizion e dal colôr e savôr dal prin vin. Si tache cu lis gnovis seminis dai cjamps pal prossim an agrari. Dutis lis ativitâts agrariis e lis stessis voris di ricostituzion des scortis, ancje pal riscjaldament vie pal Invier (len e une volte ancje cjarbon e torbe) a vevin di jessi finidis dentri de date di fonde di S. Simon (28-X). Tai zardins si cerpissin i arbusej dai pomâr, si cjapin sù i bulbis di zîs, spadis, gjorgjinis pe lôr riposizion e conservazion in ambients secs e parâts; cul zovin di lune si multiplichin par talee madrevelvis, cameliis e bos. Si prontin ancje lis busis par implantâ gnûfs çocs dai rosâr. Tai orts lis feminis a puedin semenâ ancjemò brocui e spinazis, cevolis e puars, sblancjâ fenoi e selino e setâ i crisantems. Si proviôt a parâ lis plantis plui sensibilis dai prins frêts. ■

RINGRAZIAMENT AL AUTÔR


Gjavât fûr di "Il grant lunari dal Friûl. Sants, fiestis e tradizions dal cicli dal an" (Pasian di Prât, 2012): o ringraziin l'autôr pe disponibilîtât e pe colaborazion ■ ➔ Redazion

IL FERÂL

LA MUART DAL JUST

Par memoreâ pre Renzo
(viôt l'articul in prime pagjine)
o publichìn chest articul di pre Toni,
che al riflet su le muart.

— pre Antoni Beline —



LA PLÉF DI GUART INTUN DISSEN DI GIOVANNI DI LENA

Intes vitis dai sants il moment plui alt al è chel de muart, che al à di coronâ in bielege une vite fûr dal ordenari. Une sorte di fûcs artificiai.

No stoi a contâ chestis muarts edificantis, plenis di suspîrs, di visions, di premonizions, di lûs par ogni cjanton, cul sant o la sante in senton, seneôs di cjapâ il svual viers l'eternitât. Ancje pari Cesario al à volût edificânus contant di une muart sante capitade vie par Vicenze. Un contadin, cjamat di agns e di merits, sintint a svizinâsi la sô ore, al è jevât in senton e, cun chê pocje pivide che al veve, al à berlât: "Viva il papa!" e al è spirât. Veramenti jo o crôt che un pari di famee al varès podût cumiatâsi dai siei fîs e nevôts che a contornavin il so jet cun alc di plui saurî.

O pensi che chestis pagjinis a servissin plui par inluminâ une ipotetiche santitât che par onorâ la veretât. E la veretât e je che la muart e fâs pôre a ducj, fûr che ai stupits. Ancje Crist, peât al Pari te eterne consustanzialitât e duncje simpri inluminât de glorie, al à sudât, vaiût e berlât.

Mi visi che une di Modeste, la mari dal muini, classe 1905, e je lade a copâ un gjal. Mieg'ore dopo e je rivade dute sudade e sgrifignade. "Siôr plevan - mi à dit -, ch'al sinti ce che mi tocje! O soi lade a copâ il gjal come simpri e o ai crodût che mi sbilfâs. Mi faseve cuintri come un

danât e nol voleve savênt di murf. Il mont si sta propit voltant cul cûl par aiar!"

Se duncje lis bestiis a àn pôre di un fat naturâl, tant plui l'om, l'unic nemâl che al à cussience di jessi mortâl. E nol ten il fat di jessi plui o mancun bon o just. Parcè che nissun nol è vonde bon e sant denant dal Bon e dal Sant. "Puedial jessi mont un mortâl denant dal so creadôr? Ve, lui no si fide nancje dai siei fameis e ancje tai siei agnui al cjate pecjis" (Jp 4,17-18).

E je duncje la pôre di Diu e dal misteri e la voe di restâ di ca, ancje se intune val di lagrimis. Si pò alore acetâ la muart, rassegnâsi, frontâle miei che si pò, ma cence pratindi di

saltâ di contentece. Ancje se un al è, o al riten, di jessi just. Al rivuart i ebreos a son tant plui concrets e umans di nô.

Il re David, cun dut che al jere un re seont il cûr di Diu, nol voleve murf e al à domandât la maniere di scapolâlê. Un rabin i à dit: "Lei la Torah e tu vivarâs, parcè che la Torah, la leç di Diu, e je vite". E David al leieve saldo la leç, cence fermâsi un lamp, par no murf. Ma la muart e veve di fâ il so cors e e à cjatade la sô strade. Une sere di simpri te sô leture devote, pal barcon spalancât si à sintût un ucel che al cjantave cuntune vôs e une armonie mai sintude. Il re si è fermât un lamp e si è svicinât al barcon par viodi une creature cussì straordenarie. Al è bastât chel lamp di soste par che la muart lu brincàs e lu puartàs là che a son destinâts regnants e sotans.

Ancje par Abram e jere rivade l'ore. L'agnul de muart i va incuintri e j dîs: "Il Signôr mi à mandât a cjoliti". "Puedial l'amî desiderâ la muart dal amî?" al proteste Abram. L'agnul de muart i rispuint cuntune domande: "Puedial l'inamorât no bramâ di vê simpri cun sè la persone amade?". "Alore o ven" al rispuint Abram.

Mosè al stave par murf a 120 agns, ma l'anime no voleve bandonâ il cuarp di chel servidôr di Diu. Alore Diu si svicinâ a Mosè e lu bussâ te bocje. E cu la bocje i supâ l'anime. ■

IL RICUART DI UN AMÎ CHE AL JERE ANCJE LUI IN "FABRICHE"



RENZO DENTESANO INTUN DISSEN DI GIOVANNI DI LENA

O publichìn un scrit di pre Toni Beline li che al è nomenât pre Renzo Dentesano, che nus à lassâts il mès stât. Tal toc, pre Renzo al è juste nomenât, ma si dà la idee di trop timp che a jerin leâts chei dal grup di predis di Glesie Furlane.

Il liceu nomenât tal scrit al è chel dal Seminari.

Un dai fats che plui mi àn umiliât al è sucedût in seconde liceu, cuant che o vevi disesiet agns. O jeri di banc cun Laurinç Dentesano di Bicinins e al jere interrogât un nestri compagn. In science. No sai cemût, cualchidun i à suggerît e il Negus (il pseudonim che i dà pre Toni a chel predi professôr, n.d.r.) s'è a cjapade cun nô doi, che no jentravin come il fant di spade cuant che al è in zûc cope. Nus à condanâts a ripuartâi, pe setemane dopo, cent e vincj pagjinis sui nemâi. O vin dit e stradit che no vevin suggerît, ma lui nuie.

Tal indoman, chel ch'al veve suggerît al à confessât il so pecjât e al à dit clâr e tont che nô doi no vevin ni art ni part, ma lui nuie ancjemò. Nol à ritirade la condane.


Par fâle curte, o vin dât sot come danâts par vot dîs, comprendudis lis oris di ricreazion e di passejo, fasintsi domandis un cul altri, fin che o vin imparât a memorie ducj i nons. Une fadie stupide, ma che nus veve scanâts.

La setemane dopo, tal martars, nus à clamâts fûr e al à tacât a domandânus ducj i nons. Ju savevin ducj. Alore al è passât su la dintadure di chescj sfondrâts di gjats salvadis o "felini". Le savevin ancje chê e lui al tufave come il demoni.

Ma al veve decidût di freânus e nus à freâts. Cu la nomenclature latine, che no jere in programe. O vin induvinât alc sul leon, ch'al jere "felis leo" e sul gjat, ch'al ere "felis felis" e o sin colâts su la tierce.

Cussì si cjapavin i cuatris in chê volte in seminari! E nol jere il cás di podê rimediâ, se lui no si indegnave di tornâ a clamâ e, une volte lâts fûr, di scoltânus. ■ ➔ Pre Toni Beline, gjavât fûr di «La fabriche dai predis»

CÎR
LA NESTRE PAGJINE
LA PATRIE DAL FRIÛL
SU FACEBOOK



...e frache il "mi piace"
par seguînus ancje li!

